

AENTSU NINIURIN CHICHAME MASHINIU AMIKTIN

Yónkuam 10, 1948 uwitin, Naciones Unidas-num núkap aents tuókar, kókaram chichaman amiktinian etsérkaru ainiawai. Jú chichaman yajó nunkanam aújas nekawar, etsérkar, aujmattsar iniankókiarat tuser najónawaru ainiawai. Tura aentsank. uchi unuimiainiana ausha, aentsu chichame étserkamuana aón achikiar aujsar, unuimiarar nekawar nii pujamuri umintikiarat tuser. Tura aentsank yajó nunka tepakmanumash mash jú papin nekawar, etsérkar, paón ajósma atí tuser. Tuma asamtai nukap aents tuakar, jú chichaman yajó nunka. etserkamu atí tuser ejérraru ainiawai.

JUÁRMA

Aents yajauch chichaman waintsuk ankón pénker pujustin ainiawai. Yajó nunkanam . aentsu chichame etsérkamu mashi paórlt ajóstin ainiawai. Shuar chíkich aentsjaish nuamtak métekkarak iisma atin ainiawai.

Aentsu chichame pénker etsérkachma, nekóchma asamtai, shuar wishikkramu, asútiamu, eméskamu, awótram, yajaúch amókma ainiawai. Tuma asamtai yamaikia ukúnma aí aents nuómtak nunkanam pénker asutiachma, waíttcha pujúsat tamaiti.

Aents yajauch nétse ainis enentaimin, aentsu chichame mashiniu amiktin, kókaram papinium aórma arantukma tama awai.

Yajó nunka tepakmanumash ii shuarijjaish pénker nekaniar, aróntunaikiar pujustin tamaiti.

Naciones Unidas-num aents anaikiamu ainia aú iruntrar, aents métekkarak armí tuser papinium aórar útsukaruíti. Aentsan aishman, nuajaish métek emkiar, takakmakiar, weenak, ankan penker pujusarat pujusarti tiaruíti.

Yaja nunkania ainiana au, Naciones Unidas-num irunar chichaman juki wenana aú, yaintai tiaru ainiawai. Shuara chichame mashi nekówar amikiarat tiaruíti.

Aentsu chichame mashiniu amiktin, papinium paónt kókaram aórma asamtai, mash nekawar amikiartitiaruíti.

MASH AENTS TUÁKAR AÚJMATISAMU

Júna étserewaíai

Aentsu Niniurin Chichame Mashiniu Amiktin

Aentsu chichame mashiniu amiktin etsérkamu asamtai, Naciones Unidas-num aents irutkamunmania, mótsatkamunmania tuókar, jú chicham pénker amikiarat tuseraujmat sar etsérkaru ainiawai. Ashi aents takakmainiana ausha ju chicnaman nekówar unuiniaki, etsérkiar weénawai. Kókaram chicham aórman, ju nunkanam tura yajó nunkanmash arantukar amikiarat timiaiti.

TÁMA CHIKÍCHIK

Aents yajó nunkanam akínia asamtaish, metekrak ainiaji. Tumasha ni chichamenka tuke amiktin ainiawai. Ni iniakmamuri, ní chichamejaituke aniakmamsar chichakartin ainiawai. Tuma asamtai aents mash nekawar, penker metekrak, nuamtak waró warat shiir pujusarmi tuser aórma awai.

TÁMA JÍMIAR

Mash nunkanmania aents matsatka aínia aú,jú papi kókaram aarma, nii amikiartin tama etsérkamuiti. Tura nua, aishmankash, nii chíkich yuúsrin takakiatsha; yajó nunkanmania óchitkiaitiat, chíkich aentsjaish apatkar iyamka metekrat ainiaji. Aents chíkich aentsjai póchitkiaitiat, niisha kuitia takakchaitiat, turuskesh takakuitiat, yajó nunkanam akiniaitkiusha chíkich aetnsjaish métekkarak ainiawai. Tuma asamtai aents nisha iirka akush juú nunkanam pujótikia, penker pujúsar, kókaram papí aórma óna aón tukeumiktiniaitji.

Nunisan aents mash nunkanam niisha pujuinia ausha, ni uótrin umirin asar, maónitsuk, ankón penker pujusarat tuser jú papí aarman umikiartinaiti.

TÁMA MENAÍNT

Aents niisha yajania akusha tuke jú papinkia amiktin ainiawai. Tura pénker ankan pujustin, kajernaitsuk, awatnaitsuk pujusartin ainiawai.

TÁMA AÍNTIUK

Aents tí iniótai, waítkiaitia, tíi takókmaritiktai, aents surútai, aíniana aúka najashtin tama kókaram papi aórma awai. Tura aents niisha pénker puja anónkar, yajó nunkanam jukír surúchatnuiti. Tura shuaró muúke tsupikiar surukchatnuiti.

TÁMA EWEJ

Aents aínia au nónkamsar awattrashtiniaiti. Tura waítkiasar apójsashtiniaiti. Tura chíkich shuar tunamaru aínia ausha wishikrar, usúkiar, misú ukuinkiar natsónmai ekamsachminiaiti.

TÁMA UJÚK

Aents chíkich ainia au, waitmenmai amajainia wainkiurkia uunt ainia au wórik ujókartiniaitji. Kókaram chichamjai asutiawarat tuser, tura nuyó ayampruktin awai.

TÁMA TSÉNKENT

Kókaram chicha m juamunmaka, aents mash métek akiniawaru asamtai yaimkiartinaiti. Aentsu awótin, waitmenmai amajainiakuinkia uónt anaikiamu élinia aú, jú chichaman uminiachkui asútiamu aórtiniaiti. Aents chíkich aentsun, kajéreak shainch iis ajakuinkia; wijaiinkia metékchaitme takuish; aentstikia chíkich aentsjaish métek asar ayamrumaktiniaitji.

TÁMA YARÚSH

Mash aents amia aú, kókaram chicham .iwiartainiam, waúmak yaimiainiachkuinkia, aents kajérsuk, kakóram chichaman umikiarat tuser yainkiartinaitji.

TÁMA USÚMTAI

Aents nónkamas weka wainkiursha, aóntar achikiar sepunam enkeachminiaiti. Tura nónkamsar níí nunkénia, níí mótsatkamurinia yajó nunkanam jukishtiniaiti.

TÁMA NÁWE

Chíkich aents akuisha, kókaramchichamjainkia metékkarakainiawai. Tuma asamtai aents nankamsarkia sepunam enkeachminiaiti. Tura nankamsarkia ni matsatkamurinia, irutkamurinia enkémar yajó nunkanam jukichminiaiti.

TÁMA NÁWE CHIKÍCHIK

Aents chíkich aentsun antar kasómka wainkidchiat, waúrkiar kasarrikayi tichatnuitji. Kasómka wainkia asarkia, aents uónt anaikiamu ekétu ujaktiniaitji. Chíkich aents umitmakun, níí aentsri iniamrasha aminiaiti. Nuna pénker nekamí tuser óya úntak untók iruntrar iwíaratin ainiawai. Tura nii shuari ii chichamejai chicharak ayamrakuinkia anturkatin ainiawai.

Ekuatura uuntri kókaram papi aórma iisar umikiartin ainiawai. Aents tunaku, nu papijiai sepunam urútma nantua pujustata, kuitniasha urútmana akikmaktinait tuser nu chicham pénker nekatín aín.iawai. Ekuatura uuntri kókaram papi aórma, aents umitsuk nankamas nukap tsawant .sepunam enkeachminiaiti, aentsank nónkamsar núkap kuit akikmakta tusarkia aents anankashtiniaiti.

TÁMA NÁWE JÍMIAR

Aents aóntar, chíkich shuaran jeón nankamas waniachminiaiti. Tura aentsan óntar níí jeón enkéma níí imiatkinrin takaschatnuiti, tura entrar waintiuar awatchatnuiti. Tura tsanumashtiniaiti. Aentsank waít chichamnasha etsérkenikia wekaishtinaiti. Nuna tura Ekuatura untri wainkiunka kókaram chichanijai jú aentsun asútiatnuiti.

TÁMA NÁWE MENAÍNT

Shuar nónkamas ni nunkenchu wekasashtiniaiti. Tura aents tui pujustiniait nunasha ninki wakeruk jui pujustatjai titiniaiti.

Aents ni nunkenia jinki, yaja nunkanam pachitsuk weminiaiti. Tura nú aents, ni nunke waketkitiaj takunka, uyumatsuk waketkitnuiti.

TÁMA NÁWE AÍNTIUK

Aents aínia au nankamas chíkich aents kajerkamka, ni nunkenia jinki chíkich nunkanam pachitsuk weminiaiti. Jú aentska yajó nunkanam pujóstaj takunka ni wakeramu

tsawantin, uwitin pujusminiaiti.

Aents niisha yajó nunkanam wétasa puja, turuskesh weó, itiurchat chi.cham jurúckhamniaiti. Chicham Naciones Unidas-num ejéramu aó asamtai.

TÁMANÁWE EWÉJ

Aents ni nunké akinia asa, tuke nú nunkanam achitkia atiniaiti. Tumaasamtai Ekuatura untri tuké yainma atiniaiti.

Aents ni nunke akinia, chikich nunkanam wetaj tau itiurchat amasachminiaiti, tumaitkuish chikich nunkanam pujustaj tusa wakera suritkiashtiniaiti.

TÁMA NÁWE UJÚK

Aeshman natsa, nua natsa ainia aó, pachitsuk ni aents wakeramurijai nuatnaik turuskesh, nuatak pujusminiaiti. Inkish tura tarimiat aents akusha, chikich aents ARÚTMAM- (Dios) enentaimtin akusha, yajania. nunka pachikia akusha, pachitsuk nuatak, nuatnaik ni shuarijiainajónairar pujusminiaiti. Tura aentsank ajapnaiyataj takusha pachitsuk ajapnayaimnia ainiawai.

Aeshman, nuajai mae wakerunai ajaras nuatnaikiarmin ainiawai. Nua, aeshman imian nuótak, nuatnaik pujuschammnia enentaimkiunka turachminiaiti, óyatkish tsanink pujúsminiaiti.

Aents nuatnaik nuwen, uchirin takakuka, irutkamunam, matsatkamunam paan ajaras pujusartiniaiti, tuma asamtain Ekuatura untrinkia chicham yajauch akuish pachitsuk ayamrutinówai.

TÁMA NÁWE TSÉNKENT

Aents ni jeen sumóku asa, ni nérentin atiniaiti. Jeón, ajón takakuinkia niniuk atiniaiti, tumaitkush matsatkamunmash, initkamunmash chikich aentsjai irunar takókmasaruituinkia niniu ainiawai.

Aentsu jeéncha, twra ajarincha, warín óchat mash niniu asarmatai, aóntrar núnka atónkir aents jurúckchatnuiti tama aórma ówai.

TÁMA NÁWE YARUSH

Aents pachitsuk ni wakeramun, ónkan enentaimin aótiniaiti, tura niísha ARÚTMARIN enentaimtin órhliniaiti. Tura pachitsuk ni ARÚTMARIN, ni enentai yapajia, ankan pénker pachitsuk pujusmin ainiawai. Nuna turuiniakuinkia ómas turúskesh paónt ajósar warinkish ARÚTMAN wararsammia ainiawai.

TÁMA NÁWE USÚMTAI

Aents ni enentaimmian, ishamsuk chikich aetns ainia aóun ujaktin ainiawai. Tura aentsank chikich aents ainia au, metekrakka enentaimin ainiatsui, tumaitiak itiurchat aents chichaku asarmatai, itiurchat amasashtiniaiti. Chicham pénker nekar tuinkish etsérkamu atiniaiti ishamsuk.

TÁMA NÁWE JÍMIAR

Aents maónitsuk pénker pujuinia shiir awajsar yainkiar iruntrar nuamtak pénker pujustiniaiti.

Turasha aents irunar nuómtak tsanink pujustajtsa nakitia, antrar utsukchatnuiti.

TÁMA NÁWE JÍMIAR CHIKÍCHIK

Mash aents Ekuatura untri chichame etserkui, umirkatnuitji. Ekuatura untri, aents anaik takókma tusa apújsamujai pénker iruntrar takakmastiniaitji.

Aents Ekuaturnum pachitkia asa tuinkish pachiniaik takakmastiniaiti.

Aents ni aentsrijai, anaik ekentsamu, Ekuatura untri arantuktiniaiti. li aentsri anaikiar ekemtsami tusarkia, papinium ajaptainiam anaikiar, ekentsamu atiniaiti.

TÁMA NÁWEJÍMIAR JÍMIAR

Aents mash ankón uyómtsuk pénker enentaimsar pujusarat tusar, Ekuatura untri ii aentsri yaintiniaiti. Chikich nunkanmaya uunt anaikiamu akusha, Ekuatura uuntri pachitsuk yainkiartin ainiawai.

TÁMA NÁWE JÍMIAR MENAÍNT

Aents ni takótan wakérak emkéma takakmasminiaiti. Chikich aents takókmana aentsank niisha métek iísma atiniaiti. Uchi takókma puja ajópamu akuish tuke ayómrukma atiniaiti.

Aents nuwa, tura aishman akusha chikich aentSjai métek iísma atiniaiti. Aents nakitrar muijkiamu achatnuiti.

Aents ni aijiai métek takókma puja, kuit métek 'akikma atiniaiti. Waras kuitiah achik ni nuwen, ni aishrin, ni uchirin pushi sumarak, apatkun sumarat ayurat tusar. Ni aentsrijai pénker irunar, wórós wariniaksha sumak yuawarat tusar. Nuna Ekuatura uuntri ayamruktiniaiti.

Ni matsatkamurin, ni irutkamurin aents iruntrar, ni nunkén tesawar achikman ayamrumakar pénker pujúsarat tusar, chicham jurúkmia ówai.

TÁMA NÁWE JÍMIAR AÍNTIUK

Aentsun tuke takókmas ayamratin tama ówai. Tura tsawant ankón akuish tuke ayamratin ainiawai. Ni wakéramun takókmasar, ayamratin ainiawai, tura ankóntan jusar tuinkish wear ayamratin ainiawai.

TÁMA NÁWE JÍMIAR EWÉJ

Aents tsukamsuk, entsatairincha tuke taku, ni jeé pujutairi ankan pénker pujusartiniaiti. Sunkúrmaku akusha tsuamatainiam weór tsuakan sumakar tsuamartin ainiawai. Yurumtainash tuke takóku aórtiniaiti. Aentsan aents takatnum ajópamu akuish Ekuatura untrinkia tuke ayamruktin atiniaiti. Aents tunamar jadkuish, sunkúrmak pujakuish, wajema pujakuish, untach ajas pujakuish, tura warinkish ni pujamurin eménkakmataish túke ayamrumakma atiniaiti.

Nuwa ajamtin, tura uchi kuir ainiana ausha, pénker yainma atiniaiti. Uchi takusar ajapamu akuish, Ekuatura untrin ayómrukma atiniaiti tama aórma ówai.

TÁMA NÁWE JÍMIAR UJÚK

Uchi kuér ainia aó tuke unuimiatainiam unuimiartin ainiawai. Uchi unuimiartinkia kuitchaiti, Ekuatur yaimiu asamtai. Uchikia mash tuke unuimiartin ainiawai, Ekuatura untri útsua asamtai. Aentsan natsasha nuó nankómas unuimiarkin ainiawai. Ninki kakóram ajaras unuimiarartin ainiawai.

Aents unuimian emtikia, nuó arón nankómaki unuimiaki weón yayówai. Tura jú aentska tumaki weak warinkish nekaki, pénker chikich aentsjaish irunar amikrnanaiiki wetin ainiawai.

Apawach, nukuach ainia aúka, ni uchirin níf wakeramu unuimiarat tusar utsuktin ainiawai.

TÁMA NÁWE JÍMIAR TSÉNKENT

Aents ni pujustinrin, ni nekatairin, iis pénker pujustaj tau tuinkish pachinaik irunar pénker pujusmij taun útsukma atiniaiti. Tura aents mash iruntrar emkatin enentai achikiar, aró arant unuimiarar, emkatin enentai achikiar pujustin ainiawai.

Aents imiatkinia najónan, chikich aents níi najóna aitkiash jukichminiaiti, nuna Ekuatura uuntri tuke ayamrukma atiniaiti.

TÁMA NÁWE JÍMIAR YARUSH

Kókaram papi jui aarmaka, mash ju nunkanam pujati tuke umiktiniaitji. Wari Ekuaturnum tura yajónunkanam aents tuókar jú papin pénker aóraru asamtai.

TÁMA NÁWE JÍMIAR USÚMTAI

Aents mash iruntrar ankan pénker enentaimsarpujusarmi tusar, uunt anairamu matskamuham pujuinia yainma atiniaiti.

Aents ainia au ankan pénker pujusarmi tusar wakeriniaka, chikich aents ainia aujai kajernaitsuk, manitsuk pujusartin ainiawai. Tuma asamtai mash iruntrar métek pujuiniak, Ekuatura uuntri kókaram papi arman umikiartin ainiawai.

Aents mash ankón pénker pujúsarmij tusar wakeruiniaka, ju kókaram papi arma tuke umikiartin ainiawai.

TÁMA MENAINTIU NÁWE

Ju kókaram papi arman nekówaru asar aents túke umikiartin ainiawai. Aents junanekawar, ankón pénker pujusarat tusar, uunt chikichkimsar surimkiartiniaiti. Tura chikich aents ainiana ausha nunakó surimkiachartin ainiawai. Jú kakaram chicham apipium aarman mash aentstikia umikiartin ají.